

四庫全書

集部

欽定四庫全書

集部

詩林廣記後集卷

六至八

詳校官監察御史

臣劉人睿

主事銜

臣徐以坤覆勘

總校官庶吉士

臣何思鈞

校對官助教

臣羅萬選

謄錄監生

臣姚培璽

欽定四庫全書

詩林廣記後集卷六

宋 蔡正孫 編

陳后山

朱文公語錄云黃山谷詩云閉門覓句陳無已對客
揮毫秦少游陳無已平時出行覺有詩思便急歸擁
被卧而思之呻吟如病者或累日而後起真是閉門
覓句者也

語錄又云或問后山詩恁地深他資質儘高不知如

何肯學山谷詩曰后山雅健似山谷然氣力不似山谷較大但无山谷許多輕浮底意思

魏衍序云后山詩不犯正位切忌死語非冥搜旁引不足以知之

或言后山之詩非一過可了近於枯淡彼其用意直追騷雅不求合於世俗亦惟恃有東坡山谷之知也自此兩公外政使舉世無領解者渠亦安暇恤哉

妾薄命二首

后山自注云為曾南豐作

天社任淵云按漢書許后傳曰柰何妾薄命端遇竟
寧前故曹植樂府有妾薄命篇

謝疊山云元豐間曾鞏修史薦后山有道德有史才
乞自布衣召入史館命未下而曾去后山感其知已
不願出它人門下故作妾薄命鞏南豐人歐陽公之
客后山尊之號曰南豐先生

其一

主家十二樓一身當三千古來妾薄命事主不盡年起
舞為主壽相送南陽阡忍着主衣裳為人作春妍有聲
當徹天有淚當徹泉死者恐無知妾身長自憐

謝疊山云主家十二樓一身當三千十二樓言粉白
黛綠列屋而閑居者頗多也妙在當字言其專房之
寵也

任天社云白樂天詩云漢宮佳麗三千人三千寵愛
在一身后山以五字道之語簡而意盡

又云忍着主衣裳為人作春妍此句與下篇向來一
瓣香敬為曾南豐之句皆以自表見其不忍更名它
師也

其二

葉落風不起山空花自紅捐世不待老惠妾無其終一
死尚可忍百歲何當窮天地豈不寬妾身自不容死者
如有知殺身以相從向來歌舞地夜雨鳴寒蛩

謝疊山云葉落風不起如李太白詩雨落不上天覆

水難重收此意謂人才凋零如秋風掃敗葉葉已墜地雖有風不能吹之上樹矣此言人之云亡邦國殄瘁世道日降人物隨之更不可扶持興起也山空花自紅意謂有松柏杞梓梗楠豫章棟梁之材始可謂之山今山無林木徒有野花自紅不成山矣正如朝廷無支撐世道之人班行寂寥惟有富貴之士隨時苟祿不成朝廷矣捐世不待老惠安無其終此二句無限意味后山亦自嘆南豐薦引雖力而未遂不期

南豐死之速也

任天社云一死尚可忍百歲何當窮言忍死尚可祈
死實難意謂安得速死以從其主也師死而遂背之
讀此詩者亦少知愧矣

南豐先生挽詞二首

早棄人間事真從地下遊丘原無起日江漢有東流身
世從違裏功言取次休不應須禮樂始作後程仇

任天社云丘原無起日江漢有東流此言九原雖不

可作而文章之令名當與江漢俱存老杜所謂爾曹
身與名俱滅不廢江河萬古流王介甫曾有贈南豐
詩曰曾子文章世無有水之江漢星之斗故此引用
末句乃后山自謂也文中子卷末載魏徵曰大業之
際徵也嘗與諸賢侍文中子謂徵及房杜曰先輩雖
聰明特達然非董薛程仇之比雖逢明主必愧禮樂
按程元仇璋皆文中子高弟后山自謂其材本不及
程仇不待議禮樂而判優劣也

許彥周詩話云無已作曾子固挽詞云丘園無起日
江漢有東流近世詩人莫及也

其二

精爽回長夜衣冠出廣廷
勲庸留琬琰形像付丹青
道喪餘篇翰人亡更典刑
侯芭才一足白首太玄經

任天社云末句亦后山自謂也
揚雄傳鉅鹿侯芭常從雄居
受其太玄法言呂氏春秋魯哀公問於孔子
曰樂正夔一足矣李太白詩誰能書閣下白首太玄

經

次韻荅邢居實二首

題注云居實字敦夫邢恕和叔之子也少年有俊聲

其一

漢庭用少公何在不使羣飛接羽翰
今代貴人須白髮
挂冠高處未宜彈

按邢來詩云微意平生在海塵
冠今日為君彈

王立之詩話云元祐初多用老成
故后山有此句也

漢武帝時顏驄曰文帝好文而臣好武景帝好老而臣尚少陛下好少而臣已老是以三世不遇也

其二

秋來為客意何如千里河山信不疎昔日老人今則少不妨紅葉閉門書

任天社詩注云戰國策吳起曰河山之險信不足保也此言信不疎謂心意相許與不以遠而疎也昔日老人今則少戲謂若比當代貴人文呂諸公猶為少

年也樂天有詩云猶有誇張少年處時呼張丈喚殷兄

丞相溫公挽詞三首

恭默思良弼詩書正百工事多違謝傳天遽奪楊公一代風流盡三師禮數崇若無天下議美惡併成空

謝疊山云時哲宗諒陰見上帝賚良弼非偶然也周公位冢宰正百工以詩書治天下與熙豐變法者不同蓋熙豐新法與溫公所志所學皆相反也

其二

百姓歸周老三年待魯儒俗方隨日化身已要人扶玉
几雖來晚明堂訖授圖心知死諸葛終不羨曹蜍

謝疊山云以文王時二老比溫公尊之至矣三年待
魯儒待字最妙蓋溫公得時行道不及三年也

黃山谷見此詩俗方隨日化身已要人扶之句嘆曰
陳三真不可及蓋天不慙遺之悲盡於此矣

按行狀云哲宗初公為門下侍郎元祐元年公始得

疾疾甚詔公肩輿至內東門子康扶入對小殿九月
薨于西府東坡作神道碑銘曰為政一年疾病半之
功則多矣百年之思謝疊山云此兩句見溫公克勤
于邦盡瘁于國因此成疾悲痛之意形於言外

冷齋夜話云余問山谷今之詩人誰為冠曰無出陳
無已其佳句可得聞乎曰吾見其作溫公挽詞一聯
云政方隨日化身已要人扶便知其才不可敵也

世說載庾道季曰廉頗藺相如雖千載凜凜尚有生

氣曹蜍李志雖見在厭厭如九泉下人

其三

少學真成已中年托著書輟耕扶日月起廢極吹噓得
志寧論晚成功不願餘一為天下慟不敢愛吾廬

謝疊山云此詩言溫公平日之學以誠為本中庸云
誠者非自成已而已也所以成物也東坡作溫公神
道碑亦云溫公平生惟一誠公奉祠十五年著道鑑
一書其實與熙豐新法不合及其沒也赤子無所恃

怙天下寒士無廣廈萬間之庇豈但吾廬破而受凍哉

任天社云輟耕扶日月起廢極吹噓言公既執政士大夫得罪於熙豐者極力薦引而用之日月吹噓字雖不對而事勢氣象實相等此詩人之妙也

又云東坡祭歐公文云蓋上為天下慟而下以哭吾私此反而用之言不復哭吾之私也淵明詩曰吾亦愛吾廬此借用其字廬謂吾所庇托焉耳老杜詩云

安得廣厦千萬間大庇天下寒士俱歡顏風雨不動
安如山嗚呼何時眼前突兀見此屋吾廬獨破受凍
死亦足蓋以天下為憂而忘其私也后山末句用此
意

嘲秦觀

觀字少章秦觀少游之弟也

長鋏歸來夜帳空衡陽回鴈耳偏聰若為借與春風看
無限珠璣咳唾中

王立之詩話云少章登第後方娶后山作此詩時猶未娶故多戲句帳空聞鴈之語皆戲其獨宿無寐也

示三子

序云時三子歸自外家

去遠即相忘歸近不可忍兒女已在眼眉目畧不省喜極不得語淚盡方一哂了知不是夢忽忽心未穩

謝疊山云杜子美亂後見妻子詩云夜闌更秉燭相對如夢寐辭情絕妙無以加之晏詞竊其意云今宵

剝把銀缸照猶恐相逢是夢中周詞反其意云夜永
有時分明枕上覷着孜孜地燭暗時酒醒元來又是
夢裏皆不如后山祖杜工部之意著一轉語了知不
是夢忽忽心未穩意味悠長可與杜工部爭衡也

雪後黃樓寄負山居士

林廬煙不起城郭歲將窮雲日明松雪溪山進晚風人
行圖畫裏鳥度醉吟中不盡山陰興天留憶戴公

謝疊山云雲日明松雪溪山進晚風二句絕妙余嘗

獨步山巔水涯積雪初霽雲歛日明遙望松林徘徊
溪橋踏月而歸始知此兩句如善畫作詩之妙至此
神矣末句意思尤妙蓋相見則意愜意愜則不復憶
之矣王徽之之不見戴逵而反乃天留此相思之情
於無窮也

送蘇公知杭州

詩注云東坡出知杭州道由南京后山時為徐州教
授告徐守孫覺願往見而覺不之許乃托疾謁告來

南京送別同舟東下至宿而歸事見東坡荅陳傳道
書及劉安世彈章

劉安世彈章云士於知己不無私恩既効一官則有
法令師道擅去官次陵蔑郡將徇情亂法莫此為甚
平生羊荊州追送不作遠豈不畏簡書放麀誠不忍一
代不數人百年能幾見昔如馬口銜今為禁門鍵一雨
五月涼中宵大江滿風帆目力短江空歲年晚

任天社詩注云此詩首句羊荊州以比東坡晉羊祜

督荊州諸軍郭奕因送祐出界坐此免官后山既送東坡為劉安世所彈乞正其罪嘗除太學博士又為言者以此事論列遂罷此句殆亦詩識也。豈不畏簡書放麋誠不忍此二句上下若不相屬而意在言外叢林所謂活句也按韓非子云孟孫獵得麋使秦西巴載之持歸其母隨之而啼秦西巴弗忍而與之孟孫大怒逐之三月復召以為子傅曰夫不忍麋且忍吾子乎嗚呼觀過可以知仁后山越法出境以送

師友亦放麕之類也。○一代不數人，百年曾幾見。后山謝再授徐州教授，啓亦嘗有云：「昨緣知舊出守東南，念一代之數人，而百年之幾見，間以重江之阻，莫期再歲之逢，使一有於先顛為兩塗之後悔。」又云：「中山之相仁於放麕，亂世之雄疑於食子，惟其信之既篤，所以行之不疑。」○昔如馬口銜，今為禁門鍵，謂馬銜猶可脫去，禁鍵不容輒開。言官身拘係，不可輒出也。○風帆目力短，江空歲年晚，言風帆愈遠，恨目力

不能送之人去江空恍然自失吾之年歲日已遲暮
懼其不復再見也其愛賢惜別之意可謂切矣

謝疊山云此詩云一雨五月涼中宵大江滿風帆目
力短江空歲年晚蓋熙豐新法虐於熒焚元祐初年
溫公當國更化善治人心歡欣如五月得雨豈不快
哉溫公云亡人已知後日必有反覆之患此詩謂元
祐初政膏澤下於民者猶未浹洽如五月得一雨亦
能變暴暑而為清涼若雨至中宵大江亦滿則田疇

之沾足禾稼之暢茂可知矣惜乎元祐之政僅如五
月之涼未至大江滿也今蘇公以議論不合而去國
國事將日非矣朝無真宰相奇才如東坡者不得大
用譬如江邊送行舟順風張帆一息數百里風帆已
遠恨吾目力短而望之不及回視江中更無行舟此
必天寒歲晚之時以喻朝廷無人才不信仁賢則國
空虛非叔未之世而何

送秦觀

題注云觀從東坡學於杭州

士有從師樂諸兒却未知欲行天下獨信有世間疑秋
入川原秀風連鼓角悲目前豚犬類未必慰親思

柳子厚荅韋中立論師道書曰獨韓愈奮不顧流俗
抗顏而為師世果羣怪聚罵又曰天下不以非鄭尹
而怪孫子何哉獨為其所不為也后山此詩云欲行
天下獨信有世間疑意本諸此時山谷亦有詩送之
今附於左

附山谷送秦觀

班衣兒啼真自樂從師學道亦不惡但得新年勝舊年
即如常在郎罷前

和江秀才獻花

疎花得雨數枝黃白髮緣愁百尺長要與老生同一醉
故留秋意作重陽

李太白詩云白髮三千丈緣愁似个長后山詩本此
次韻李節推九日登高

平林廣野騎臺荒山寺鳴鐘報夕陽人事自生今日意
寒花只作去年香巾歌更覺霜生鬢語妙何妨石作腸
落木無邊江不盡此身此日更須忙

李後主詩云鬢從近日添新白菊是去年依舊黃后
山云人事自生今日意寒花只作去年香意調亦同
落木無邊江不盡之句亦本老杜登高詩云無邊落
木蕭蕭下不盡長江滾滾來

猴馬

沐猴自戲馬自驚圉人未解猴馬情猴其天資馬何罪
意欲防患猶傷生異類相宜亦相失同類相傷非所及
志行萬里困一誤吐豆齟茨日伏檻

本序云楚州紫極宮有畫沐猴振索以戲馬頓索而
驚圉人不測從鞭之人言沐猴宜馬今反為累作
詩以導馬意云

按韓鄂四時纂要云常係獼猴於馬坊內辟惡消百
病令馬不着疥

任天社云此詩云異類相宜亦相失同類相傷非所及非所及猶言非思慮所及也物惡傷其類此理之固然而其間亦有相傷者豈可復以常理待之邪后山自徐學除太學博士以言者罷既而移潁州故有同類相傷與志行萬里困一誤之語

次韻秦少游春江秋野圖

后山自注云宗室所畫

翰墨功名裏江山富貴人倏看雙鳥下已負百年身

任天社云南史梁忠烈世子方等傳云性愛林泉特
好散逸嘗著論曰吾不及魚鳥遠矣魚鳥飛浮任其
志性吾之進退嘗在掌握若使吾終得與魚鳥同遊
則去人間如脫屣耳此宗室事故后山引用蓋舊制
宗室在宮有出入之限有不許外交之禁故也

其二

江清風偃木霜落鴈橫空若箇丹青裏猶須著此翁
后山自注云秦詩云請君添小艇盡我作漁翁

任天社云此言少游方見用於世非江海之士不當
盡之漁舟也

黃魯直荅王立之書云小詩若能令每篇不苟作須
有所屬乃善頃來詩人惟陳無已得此意每令人歎
伏之蓋渠勤學不倦味古人語精深非有為不發於
筆端耳觀此二詩信魯直之善論也

觀文忠公家六一堂圖書

歐陽文忠公封文忠公六一堂見歐陽公詩卷首注

生世何用早我已後此翁頗識門下士畧已聞其風中
年見二子已復歲一終呼我過其廬所得非所蒙先朝
羣玉殿冠佩環羣公神文煥王度喜色見天容御榻誰
復登帝書元自工黃絹兩大字一覽涕無從似欲托其
子天意人與同歷數況有歸敢有貪天功集古一千卷
明明並羣雄誰為第一手未有百世公庶器刻科斗寶
樽蟠華蟲緬懷弁服士酬獻鳴琰琬挿架一萬軸遺子
以固窮素琴久絕絃棊酒頗闕供向來一瓣香敬為曾

南豐世雖嫡孫行名在惡子中斯人日已遠千歲幸一
逢吾老不可待露草濕寒菴

任天社云此詩集古一千卷至棊酒頗闕供之句蓋
用文忠公六一居士傳中語謂吾家藏書一萬卷集
錄三代以來金石遺文一千卷有琴一張有棊一局
常置酒一壺以吾一翁老於五物之間是為六一

又云南豐東坡皆六一門下士南豐修史薦后山以
布衣入史館命未下而曾去國後以東坡薦得官此

詩云向來一瓣香敬為曾南豐后山雖感東坡而不以為知己作此詩時東坡正為郡守終無少貶阿附之意可謂特立之士矣然亦知東坡之大必能受之也

絕句

此生精力盡於詩末歲心存力已疲不共盧王爭出手却思陶謝與同時

胡荅溪云后山絕句云此生精力盡於詩與溫公資

治通鑑表云臣之精力盡於此書之語相同豈偶然
邪

以拄杖供仁山主二首

錯節孤根勁有餘坐床須按起須扶一生用底今相贈
更問林間有此無

趙州語錄云趙州臨仙化以拂子送與王谿曰此是
老僧一生用不盡底

謝疊山云一生用底今相贈更問林間有此无此二

句有無限意味見拄杖之奇又見后山與仁山主契
好之厚

其二

洗足投筇只坐禪厭尋岐路費行纏老來不復人間事
不用山公更削員

桂苑叢談云潤州甘露寺有僧道行孤高李德裕廉
問日以方竹杖一贈焉方竹出大宛國堅實而正方
節牙鬚牙四面對出及再鎮浙右其僧尚在問曰前

所奉竹杖无恙否僧喜對曰已規員而漆之矣公嗟
惋彌日前輩曾有詩云削員方竹杖漆却斷紋琴

謝疊山云孫真人云人之處世智欲員行欲方柳子
厚云鑿去方心規以大員此言世俗喜員惡方方者
難合員者易投今不復與人間事不必操方為員矣
項城道中寄劉令勸修溪橋

老怯溪橋泥沒膝喜聞吾黨政如春須君不惜千金費
此後寧無我輩人

謝疊山云此言好事到手不肯做將後被別人做了
任天社云此言必有好事者繼之

送吳先生謁惠州蘇副使

題注云蘇副使東坡也吳先生當是吳遠遊蘇公嘗
有書與之

聞名欣識面異好有同功我亦慙吾子人誰恕此公百
年雙白鬢萬里一秋風為說任安在依然一禿翁

任天社注云聞名欣識面言吳君欲識東坡也異好

有同功言吳君方外之士與后山異趣而好賢之意
則同故云同功我亦慙吾子人誰恕此公言后山不
能往見蘇公此所以有愧於吳君也此二句大妙百
年雙白鬚萬里一秋風時東坡年五十九此言神交
心契與風无間也未句后山自謂不負蘇公之門時
亦坐黨事廢錮故云秃翁漢霍去病傳云衛青日益
衰而去病日益貴故人門下多去事去病輒得官爵
惟任安不肯去又灌夫傳與長孺同一秃翁注言无

官位版授也

蠅虎

物微趣下世不數隨力捕生得稱虎匿形注目搖兩股
卒然一擊勢莫禦十中失一八九取吻間流血腹如鼓
却行奮臂吾甚武明日淮南作端午

任天社云后山此詩盖有所指而云末言恃勇而不
知及禍也世傳淮南王安萬畢術云以五月五日取
蠅虎杵汁拌豆豆自踴躍可以擊蠅

謝疊山云此譏小人之好搏擊者

陳留市隱者

陳留人物後疑有隱屠耕斯人豈其徒滿腹一杯羹
娉小女子與翁同醉醒薄暮行且歌問之諱姓名子豈
達者歟槁竹聊一鳴老生何所因稍稍聲過情閉門十
日雨吟作饑鶯聲詩書工發冢刀鑷得養生飛走不同
穴孔突不暇黔

王直方詩話云陳留市有刀鑷工隨其所得為一日

費醉吟於市負其子以行歌江端禮以為達者為作
傳而要元已作詩閉門十日雨吟作烏鳶聲之句大
為山谷所愛山谷亦擬作有云養性霜刀在閱人清
鏡空

附山谷擬作陳留市隱

自序云陳留江端禮季恭曰陳留市上有刀鐻工年
四十餘无室家子姓惟一女年七歲矣日以刀鐻所
得錢與女子醉飽醉則簪花吹長笛肩女而歸无一

朝之憂而有終身之樂疑以為有道者也陳无已為
賦詩庭堅亦擬作

市井懷珠玉往來人未逢乘肩嬌小女邂逅此生同養
性霜刀在閱人清鏡空時時能舉酒彈鐏送飛鴻

送兄子孝忠落解南歸

妙年失手未須恨白璧深藏可自妍短髮我今能種種
曉粧他日看娟娟千金市帚能論價萬戶封侯信有年
清白傳家有如此歸塗囊盡不留錢

唐人赴省以詩文獻典貢舉者有詩云洞房昨夜停
紅燭待曉堂前拜舅姑耳畔低聲問夫壻畫眉深淺
入時无后山曉粧他日看娟娟意本諸此

愚按此詩乃用東坡與潘三失解後飲酒詩韻

附東坡與潘三失解後飲酒

千金敝帚人誰買半額蛾眉世所妍顧我自為都眊矚
憐君欲鬪小嬋娟青雲豈易量他日黃菊猶應似去年
醉裏未知誰得喪滿江風月不論錢

趙彥材云撫言載唐進士失解醉飽謂之眊眊今句
云顧我自為都眊眊則以不獨潘三失解為有眊眊
之愁而我所為失意无一不是眊眊矣

謝憲臺趙史惠米

平生忍欲今忍貧閉口逢人不少陳俸薄身清趙都史
也能作意向詩人

謝疊山云后山能忍貧達官名賢哀其貧袖白金餽
之見其辭色無窮態議論愈介潔竟不敢出建中靖

國辛已任于朝郊祀為執事官其内子聞郊壇高寒
非挾纊不可借姨夫趙挺之綿裘衣之臨行后山問
此裘所從來妻以實對后山脫而擲之地其夜寒凍
得疾不起此憲臺一都史惠米則受以詩謝之盖取
其俸薄身清能尊敬賢人也此詩起句緊切后山清
介真是如此即非寓言忍欲忍貧四字亦不苟

絕句

書當快意讀易盡客有可人期不來世事相違每如此

好懷百歲幾回開

復齋漫錄云此无已得意詩也其後又寄黃充前四句云俗子推不去可人費招呼世事每如此我生亦何娛盖无已得意故兩見之

謝疊山云无已此詩云好懷百歲幾回開其化事甚巧盖是用莊子盜跖之言曰人上壽百歲中壽八十下壽六十除病疾死喪憂患其中開口而笑者一月之中不過四五日而已不用其語而用其意謂之化

抱朴子曰陸子十篇誠為快書又晉嵇生云每讀二
陸之文未嘗不廢書而歎恐其卷之竟也

附寄黃充

俗子推不去可人費招呼世事每如此我生亦何娛黃
生後來秀純茂靜者徒不見動經月來亦不須臾人事
已好乖可復自作疎子雖向人懶勝處不可孤迨此田
事休仍當秋雨餘深知阻泥濘步履意何如

騎驢

復作騎驢不下驢此生斷酒未須扶獨無錦里驚人句
也得梁園畫作圖

任天社云叢林謂叅禪人有二病一是騎驢覓驢二
是騎却驢不肯下識得驢了騎却不肯下此一病更
是難醫若解下方喚作无事道人后山所謂復作
騎驢不下驢之句豈謂是邪

王立之詩話云雙井黃叔達字知命自江南來京師
與彭城陳履常俱謁法雲禪師于城南夜歸遇龍眠

李伯時時知命著白衫騎驢道中搖頭而歌履常負
杖挾囊于後一市皆驚以為異人伯時素善畫因寫
以為圖邢惇夫作夜歸圖詩此詩末句追記此事也
履常即后山舊字

寄曹州晁大夫

晁端仁字堯民

墮絮隨風化作塵黃樓桃李不成春只今容有名駒子
困倚欄干一欠伸

自注云周昉畫美人有背立欠伸者最為妍絕東坡

為賦續麗人行也

任天社云此篇蓋言徐州風物后山嘗有詞并序云
晁大夫增飾披雲初欲壓黃樓而張馬二子皆當年
樽下世所謂英英盼盼者盼卒英嫁而盼之子瑩頗
有家風而曹妓未有顯者黃樓不可勝也作南鄉子
以歌之曰風絮落東隣點綴繁枝旋化塵關鎖玉樓
巢燕子冥冥桃李摧殘不見春流轉到如今翡翠生
兒翠作衿花樣腰身官樣立婷婷困倚欄干一欠伸

又按此詩風絮以屬英塵化以屬盼名駒子以屬瑩瑩之母蓋馬氏也

歸鴈

孤矢千夫志瀟湘萬里秋寧為寶箏柱肯作置書郵遠道勤相喚羈懷誤作愁聊寬稻梁意寧復網羅憂

胡荅溪云杜牧之早鴈云仙掌月明孤影過長門燈暗數聲來六一居士汴河聞鴈云野岸柳黃霜正白五更驚破客愁眠皆言幽怨羈旅聞鴈聲而生愁思

至后山則不然但云遠道勤相喚羈懷誤作愁則全
不蹈襲也

早起

鄰雞接響作三鳴殘點連聲殺五更寒氣挾霜侵敗絮
賓鴻將子度微明有家無食違高枕百巧千窮只短檠
翰墨日疎身日遠世間安得尚虛名

藝苑雌黃云予與鄉人翁行可同舟沂汴因談及詩
行可云王介甫最善下字如荒埭暗雞催月曉空場

老雉挾春驕下得挾字最好如孟子挾長挾貴之挾
予謂介甫又有紫萸凌風怯蒼苔挾雨驕陳无已有
寒氣挾霜侵敗絮賓鴻將子度微明其用挾字正與
介甫前一聯同

寄外舅郭大夫

巴蜀通歸使妻孥且定居深知報消息不忍問何如身
健無妨遠情親未肯疎功名欺老病淚盡數行書

黃玉林云趙章泉先生嘗云學詩者莫不以杜為師

然能如其詩者鮮矣句或有似之而篇之全似者絕
難得陳后山寄外舅郭大夫詩乃全篇之似杜者也
後戴式之亦有思家用陳韻又全篇之似陳者也

戴式之思家用后山韻

湖海三年客妻孥四壁居飢寒應不免疾病又何如日
夜思歸切平生作計疎愁來仍酒醒不忍讀家書

黃玉林云趙蹈中選石屏詩而此詩乃不在所選中
何邪

除官

題云十一月除秘書省正字

扶老趨嚴詔徐行及聖時端能正幾字敢恨十年遲肯
着金根謬寧辭乳媪譏向來憂畏斷不盡鹿門期

王直方詩話云或云才得一正字亦未須云趨嚴詔
後作謝啓復云名雖文字之選實為將相之儲又云
頭童齒豁敢辭乳媪之譏聞淺見輕益畏金根之謬
任天社云此詩末句言雖免黨錮之憂而稍失其高

隱本趣也

明皇雜錄云劉晏以神童為秘書省正字上問曰為正字正得幾字對曰餘字皆正惟朋字未正

尚書故實云韓昶退之子也性闇劣為集賢校理史傳有金根車昶以為誤悉改根為銀字

南史何承天除著作佐郎年已老而諸佐郎名家年少荀伯子嘲之呼為孀母此詩乳媪字乃用此事也

小放歌行

春風永巷閉娉婷長使青樓誤得名不惜捲簾通一顧
怕君着眼未分明

當年不嫁惜娉婷傳白施朱作後生說與傍人須早計
隨宜梳洗莫傾城

王直方詩話云無已嘗作小放歌行兩篇山谷云元
已他日作詩語極高古至於此篇則顧影徘徊銜耀
太甚

鷲鳥詩

若溪

闕三字

知避而遷汝

闕二字

狸吾知遠而

闕三字

巢

晨

闕

吾枝懷毒姪凶初

闕三字

莽恭拳拳甫笑嬉嬉情

貌深厚孰從而追

自序云辛巳夏四月庚戌日將晏與客追涼露坐有
雀引雛二三集垣下行且哺俄有鵲至自北俛啄雀
間初循循然少焉行雀間遽攫一雛而升于垣出雀
不意悲鳴啾啾奮身抵鵲再三欲奪鵲竟磔雛以食
不顧如得計然坐客嘆息余感之賦是詩

愚謂此詩譏小人之陰險潛毒者聞之者足以戒云

題柱

桃李摧殘風雨春
天孫河鼓隔天津
主恩不與妍華盡
何限人間失意人

自序云永安驛廊東柱有女子題五字云無人解妾
心日夜長如醉妾不是瓊奴意與瓊奴類讀而哀之
愚謂后山少貧不得志東坡薦為徐州教授復以送
東坡被論罷後徽宗召為正字未幾而卒此詩亦以

寫其不得志之意也

青瑣高議載瓊奴姓王氏郎中幼女失身於趙奉常
家為主母凌辱道出淮上書其事於驛壁見者哀之

詩林廣記後集卷六

欽定四庫全書

詩林廣記後集卷七

宋 蔡正孫 編

梅聖俞

劉後村云本朝詩惟宛陵為開山祖師宛陵出而後
衆濮之哇淫稍息風雅之氣脉復續其功不在歐尹
下

詩話云梅聖俞詩如深山道人草衣葛屨王公大人
見之不覺屈膝

胡荅溪云梅聖俞日課一詩寒暑不易聖俞詩名滿世蓋身試此說之效耳

臞翁詩評云梅聖俞詩如關河放溜瞬息無聲

歐陽公序梅氏詩集云予聞世謂詩人少達而多窮夫豈然哉窮則愈工非詩能窮人殆窮者而後工也予友梅聖俞少以廕補為吏累舉進士輒抑於有司困於州縣凡十餘年年今五十猶從辟書為人之佐鬱其所蓄不得奮見於事業聖俞亦自以其不得志者

樂於詩而發之故其平生所作於詩尤多世既知之而未有薦於上者昔王文康公嘗見而嘆曰二百年元此作矣雖知之深亦不果薦也若使其幸得用於朝廷作為雅頌以歌詠大宋之功德薦之清廟而追商周魯頌之作豈不偉歟奈何使其老不得志而為窮者之詩乃徒發於蟲魚物類羈愁感嘆之言世徒喜其工而不知其窮之久而將老也可不惜哉

滄浪詩辯云國初詩尚沿襲唐人梅聖俞是學唐人

平淡處

朱文公云聖俞詩是枯槁不是平淡

許彥周云聖俞詩句句精練如焚香露蓮江聞磬清
鷗邁之類宜為歐公所稱其它古體如朱絃疎越一
倡三嘆讀者當以意求之

胡荅溪云聖俞詩工於平淡自成一家如東溪詩云
野鳬眠岸有閑意老樹着花无醜枝山行詩云人家
在何處雲外一聲雞春陰詩云鳩鳴桑葉吐村暗杏

花殘杜鵑詩云月樹啼方急山房人未眠似此等句
須細味之方見其用意也

范饒州坐客語食河豚魚

春洲生荻芽春岸飛楊花河豚當此時貴不數魚蝦其
狀亦可怪其毒亦莫加忿腹若封豕怒目猶吳蛙炮煎
苟失所入喉為鏤鉚若此喪軀體何須資齒牙持問南
方人黨護復矜誇皆言美無度誰謂死如麻我語不能
屈自思空咄嗟退之來潮陽始憚餐龍蛇子厚居柳州

而甘食蝦蟇二物雖可憎性命無舛差斯味曾不比中藏禍無涯甚美惡亦稱此言誠可嘉

藝苑雌黃云予按倦遊錄云河豚魚有大毒肝與卵人食之必死淪而為羹或不甚熟亦能害人歲有被毒而死者然南人嗜之不已故聖俞詩云炮煎苟失所入喉為鏤鉅則其毒可知

蘇東坡在資善堂嘗與人談河豚之美者云也直那一死其美可知也

朱文公語錄云梅聖俞河豚詩當時諸公說道恁地
好據某說只是箇上門罵人底詩只似脫了衣服上
人門罵人祖罵人父一般初無深遠底意思

孔毅夫雜記云永叔稱聖俞河豚詩云春洲生荻芽
春岸飛楊花河豚於此時貴不數魚鰕似謂河豚食
柳絮而肥聖俞破題兩句便說盡河豚好處乃永叔
褒譽之詞其實不爾此魚盛於二月至柳絮時魚已

過矣

附東坡詩

竹外桃花三兩枝
春江水暖鴨先知
萋萋滿地蘆芽短
正是河豚欲上時

胡荅溪云東坡此詩正是二月景致是時河豚已盛
矣欲上之語似未為穩

附洪駒父詠河豚西施乳

萋萋短短荻芽肥
正是河豚欲上時
甘美遠勝西施乳
吳王當日未曾知

藝苑雌黃云河豚水族之奇物亦能害人歲有被毒而死者吳人珍之目其腹為西施乳余因戲作此絕雖然甚美必甚惡河豚味之美也吳人嗜之以喪其軀西施色之美也吳王嗜之以亡其國茲可為來者之戒

老人泉

泉中有老人隱見不可常蘇子居其間飲水樂未央泉中必有魚與子日徜徉泉中苟無魚子特玩滄浪歲月

不知老家有雛鳳凰百鳥戢羽翼不敢呈文章去為仲尼歎出為盛時祥方今天子聖母滯此泉旁

東坡云先君與梅二丈遊時軾與子由弟甚少未有知者梅公獨深知之家有老人泉公作此詩聖俞沒今四十年矣南遷至合浦見其門人歐陽晦夫出其詩藁數十幅其遺晦夫詩云我家無梧桐安得久留鳳晦夫年六十六尚少余一歲然白髮蒼顏畧相似困窮亦不相遠遂相與執手大笑曰聖俞所謂鳳者

豈例皆窮如此乎

木山

空山枯楠大蔽牛霹靂夜落魚鳧洲魚鳧水射幾千秋
蠹肌爛隨沙蕩流惟存堅骨蛟龍鏤形侔三山中雄酋
左右兩峯相挾翼尊奉君長無慢尤蘇夫子見之驚且
喜買於溪叟憑貂裘因嗟大不為梁棟又嘆殘不為薪
樵雨侵蘚澁得石瘦宜與夫子歸隱丘

聖俞此詩為老泉賦蓋形容三蘇也

附東坡次木山韻

木生不願回萬牛願終天年仆沙洲時來幸逢河伯秋
掀然見怪推不流蓬婆雪嶺巧雕鏤蟄蟲行蟻為豪酋
阿咸大膽忽持去河伯好事不汝尤城中有沼浸坤軸
一林瘦竹吾菟裘二頃良田不難買三年楨木行可禱
會將白髮對蒼巘魯人不厭東家丘

本序云先君嘗蓄木山三峯梅二丈見而賦之今三
十年矣猶予千乘復得五峰益奇因次韻並刻于其

側

愚按老泉木假山記以中峯自比而以二峯比二子
讀之使人如見三蘇聖俞木山詩正本此記之意以
形容三蘇也

寄馬遵

三更醉下陵陽峰仙舟江上去無蹤
杈牙鐵鎖漫橫絕
糖濕不驚潭底龍
斷腸吳姬指如筍
欲剥玉榼將何從
短翎水鴨飛不遠
那經細雨山重重
却顧舊埒病驄馬

塵沙歷盡空龍鍾

隱居詩話云馬遵謫守宣州及其去也郡僚軍民爭
欲駐留至以鐵鎖絕江遵於餞筵倚醉令官妓剥榘
實而食眷眷若留連狀又以所乘驄馬寄聖俞家郡
人皆不疑其去也遵夜使人絕鎖解舟以水沃櫓牙
使之不鳴迨曉舟去遠矣聖俞遂以詩寄之可謂善
於叙事者也

逢賣梅花

驛使前時走馬回北人初識越人梅清香莫把酴醾比
只欠溪邊月下杯

東坡云此梅二丈京師逢賣梅花絕句吾雖後輩猶
及與之周旋覽其親書如見其抵掌談笑也

五側體

月出斷岸口影照別舸背且獨與婦飲頗勝俗客對月
漸上我席暝色亦稍退豈必在秉燭此景亦可愛

西清詩話云晏元獻守汝陰梅聖俞往見之將行公

置酒潁水河上因言古人章句中全用平聲製字穩
帖如枯桑知天風是也恨未見側字詩耳聖俞既引
舟遂作五側體寄公

莫打鴨

莫打鴨打鴨驚鴛鴦鴛鴦新向池北落不比孤洲老禿
鷗禿鷗尚欲遠飛去何況鴛鴦羽翼長

隱居詩話云呂士隆知宣州好以事答官妓官妓皆
欲逃去而未得也會杭州有一妓到宣其色藝可取

士隆愛之留之使不去一日郡妓復犯小過士隆又欲笞之妓泣訴曰某不敢辭罪但恐杭妓不能安也士隆憫而捨之聖俞因作莫打鴨一篇蓋謂此也

蘇子美

子美名舜欽為人倜儻不羈長於古文歌詩後廢居蘇州買水石作滄浪亭詩以自適

黃山谷云子美文章豪健痛快潘陸不足吞也

後村詩話云子美送李生云李生以病廢東入徂徠

峯志氣尚突兀形骸已龍鍾男兒生世間有如絕壑
松誤為風雷傷不與匠石逢哀哉千尺榦摧朽似秋
蓬此語悲壯之甚李生何如人足以當之竊意子美
自謂也

夏意

別院深深夏簟清石榴開遍透簾明樹陰滿地日卓午
夢覺流鶯時一聲

劉後村云子美雄放不羈及蟠屈而為吳體如此詩

則極平夷妥帖

絕句

綠陰垂野草青青時有幽花一樹明
晚泊孤舟古祠下
滿川風雨看潮生

王直方詩話云黃山谷最愛此絕
累書之或真草與大字

後村云此詩大似韋蘇州

復齋漫錄云此詩第二句與鄭毅夫田家詩第二句

恰相類皆清絕可愛

附鄭毅夫田家

田家汨汨流水渾一樹高花明遠村雲意不知殘照好
却將微雨送黃昏

獨步滄浪亭

花枝欹斜草生迷不可騎往步是宜時時攜酒祇獨到
醉倒惟有春風知

胡荅溪云子美獨步滄浪亭絕句真能道幽獨閑放

之趣

石林詩話云姑蘇州學之南積水彌數十頃傍有小
山高下曲折相望蓋錢氏時廣陵王所作既積土為
山因以為池瀦水焉瑞光寺即其宅而此其別圃也
慶厯間子美謫廢以四十千得之為居傍水作亭曰
滄浪歐陽公詩所謂清風明月本无價可惜只賣四
萬錢者是也子美既死其孤不能保遂屢易主矣

附歐陽公滄浪亭詩

子美寄我滄浪吟邀我共作滄浪篇滄浪有景不可到
使我東望心悠然荒灣野水氣象古高林翠阜相回環
新篁抽笋添夏影老桤亂發爭春妍水禽閒暇事高格
山鳥日夕相啾喧不知此地幾興廢仰視喬木皆蒼煙
堪嗟人迹到不遠雖有來路曾無緣窮奇極恠誰似子
搜索幽隱探神仙初尋一徑入蒙密豁見異境無窮邊
風高月白最宜夜一片瑩淨鋪瓊田清光不辨水與月
但見空碧涵漪漣清風明月本無價可惜祇賣四萬錢

又疑此境誰乞與壯士憔悴天應憐鵑夷古亦有獨往
江湖波濤渺翻天崎嶇世路欲脫去反以身試蛟龍淵
豈如扁舟任飄兀紅蕖綠浪搖醉眠丈夫身在豈長棄
新詩美酒聊窮年雖然不許俗客到莫惜佳句人間傳

松江長橋觀魚

鳴榔莫觸蛟龍睡舉網時聞魚鯨腥我實宦遊無況者
擬來隨爾帶笭簖

元次山集自釋云帶笭簖而畫船註云上丁郎切下

桑荒切竹器也故唐書音訓云讀作郎桑見元結本
集音訓又音上力丁切下息拯切取魚籠也盖有平
仄兩音自釋又云能帶苓省全獨保生能學聲斷保
宗全家聲也如此漫乎非邪其語雖叶韻然廣韻集
韻於庚清青三韻中不收此省字並於上聲迴字韻
中收之子美此詩誤押為平聲矣又黃魯直過石塘
詩云長虹垂地若篆字晴岫插空如畫屏耕夫荷鋤
解襁褓漁父晒網投苓省秦少游德清道中還寄子

瞻詩叢薄開羅帳淪漪寫鏡屏疎籬窺窈窕支港泛
筇筴皆於青字韻中押真誤也

遊太湖

沓沓波濤閱古今四無邊際莫知深潤通曉月為清露
氣入霜天作暝陰笠澤鱸肥人膾玉洞庭橘熟客分金
風煙觸目相招引聊為停橈一楚吟

復齋漫錄云子美詩云笠澤鱸肥人膾玉洞庭橘熟
客分金呂吉甫詩云魚出清波庖膾玉菊含寒露酒

浮金此二聯相類蘇勝於呂但人客兩字雖无亦可
垂虹亭觀月

月晃長江上下同畫橋橫截冷光中雲頭濫濫開金餅
水面沉沉卧綵虹佛氏解為銀世界仙家多住玉華宮
地雄景勝言不盡但欲追隨乘曉風

後村詩話云子美歌行雄放軒昂不羈如其為人垂
虹亭觀中秋月云佛氏解為銀世界仙家多住玉華
宮極工而世惟詠其上一聯金餅綵虹之句何也又

如山蟬帶響穿疎戶野蔓蟠青入破牕亦佳句

春睡

別院簾昏掩竹扉朝醒未解接春暉身如蟬蛻一榻上
夢似楊花千里飛嗒爾暫能離世網陶然且欲見天機
此中有德堪為頌絕勝人間較是非

王直方詩話云子美嘗作春睡詩云身如蟬蛻一榻
上夢似楊花千里飛歐公見之驚曰子美可念未幾
果卒

蘇梅總話

隱居詩話云蘇子美以詩得名學書亦飄逸然其詩以奔放豪健為主梅堯臣亦能詩雖乏高致而平淡有工世謂之蘇梅其實正相反也子美嘗自嘆曰平生作詩被人比梅堯臣寫字比周越良可笑也周越為尚書郎在天聖景祐間以書得名輕俗不近古無足取也

歐公詩話云聖俞子美齊名於一時而二家詩體特

異子美筆力豪俊以超邁橫絕為奇聖俞覃思精微以深遠閑淡為意各極其長雖善論者不能優劣余嘗有詩畧道其一二云子美氣方雄萬竅號一噫有時肆顛狂醉墨洒滂霈譬如千里馬已發不可殺盈前盡珠璣一一難揀汰梅公事清淺石齒漱寒瀨作詩三十年視我猶後輩文詞愈清新心意難老大有如妖嬈女老自有餘態近詩尤苦硬咀嚼有難噉又如食橄欖真味久愈在蘇豪以氣勝舉世徒驚駭梅

窮獨我知古貨今難賣

後村詩話云歐公荅蔡君謨云近時蘇梅二窮士爾
主張風雅人士歸之自二窮人死文士滿朝而使詩
道寂然中絕每念此事竊歎乃知文士滿朝而詩道
寂然不但近歲祖宗盛時固已然矣

石曼卿

六一居士詩話云曼卿自少以詩酒豪放自得其氣
兒偉然詩格奇峭又工於書筆畫道健體兼顏柳為

世所好

朱文公云石曼卿詩極有好處如仁者雖无敵王師
固有征无私乃時雨不殺是天聲長篇舊見曼卿大
書此詩氣象方嚴遒勁極可寶愛真顏筋桺骨也

隱居詩話云石延年長韻律詩善叙事其他无大好
處

王直方詩話云曼卿以書名世然大字愈妙
詩話云石曼卿詩如飢鷹乍歸迅逸不可言

金鄉張氏園亭

亭館連城敵謝家四時園色鬪明霞
牕迎西渭封侯竹地接東鄰隱士瓜
樂意相關禽對語生香不斷樹交花
縱遊會約無留事醉待參橫落月斜

文公語錄云曼卿詩如張氏園亭詩云
樂意相關禽對語生香不斷樹交花
又如籌筆驛詩云意中流水遠愁外
舊山青此數句極佳曼卿為人豪放
曾次極高而詩乃方嚴縝密如此便
是他好處可惜不得用

於世耳

雞肋集云曼卿以天聖四年來令金山故詩為此邑人作者多如題張氏園亭詩樂意相關禽對語生香不斷樹交花一聯尤為佳句

小桃

生色深紅綬帶長宮簾寒在井欄香母家昇上瑤池品
先得春風半面妝

其二

本分桃花寒食前小桃長是上春天二喬二趙俱傾國
女弟嬌強意自先

胡荅溪云曼卿詠小桃二絕其模寫命意豈不佳哉
曼卿又有詠紅梅詩云認桃無綠葉辨杏有青枝東
坡則謂其語至陋村學中體也

下第偶成集句

一生不得文章力欲上青雲未有因聖主不勞千里召
姮娥何惜一枝春鳳凰詔下雖沾命豺虎叢中也立身

啼得血流無用處着朱騎馬是何人

又集句

年去年來來去忙為他人作嫁衣裳仰天大笑出門去
獨對春風舞一場

西清詩話云集句自國初有之未盛也至石曼卿人
物開敏以文為戲然後大著元豐間王荊公益工於
此王直方謂始自荊公非也

口占戲二舉子

司空憐汝汝須知月下敲門更有誰
巨耐一霍窮相眼
得便宜處落便宜

西清詩話云石曼卿官冊府時五鼓趨朝見二舉子
繫邏舍望曼卿號呼請救因駐馬召邏卒問之曰昨
夕里閑間有納婦者二子穴隙以窺夜被執曼卿力
為揮解卒長勉從之二子叩頭拜于馬前曼卿按轡
占絕句以調之

張文潛

文潛名未東坡嘗稱其文汪洋淡泊舉進士召為太學錄後擢起居舍人坐元祐黨安置黃州

王立之詩話云文潛先與李公擇輩來予家作長句其間有漱井消午醉掃花坐晚涼衆綠結夏幃老紅駐春妝之句後東坡來讀其詩嘆息云此不是喫烟火食人道底言語

晦菴語錄云張文潛詩多好底但頗率耳

黃山谷次韻文潛詩云張侯筆端世三秀麗齊房作

詩盛推賞明珠計斛量掃花坐晚吹妙語益難忘

呂氏云文潛詩自然奇逸

王直方詩話云文潛過宋都詩云白頭青鬢隔存沒
落日斷霞無古今氣格似不減老杜

絕句

亭亭畫舸繫春潭直待行人酒半酣不管烟波與風雨
載將離恨過江南

泊宅編云東坡長短句云無情汴水自悠悠只載一

船離恨向東流文潛此詩王平甫愛而誦之不知其
本於此亦奪胎換骨法也

蔡寬夫詩話互見前集鄭仲賢詩

田家詞

南風霏霏麥花落豆田漠漠初垂角山邊夜半一犁雨
田父高歌待收穫雨多瀟瀟蠶簇寒蠶婦低眉憂繭單
人生多求復多怨天公供爾良獨難

復齋謾錄云東坡泗州僧伽塔詩有云耕田欲雨刈

欲晴去得順風來者怨若使人人禱輒遂造物應須
日千變文潛之詩用此意也

謁客

入門投謁吏翩翩我非欲見禮則然異哉賓主兩無語
客起疾走如避馬我亦不恭愧昔賢忍使塗炭朝衣冠
人生暫聚鴻集川春風吹飛何後先

愚謂此詩末句之意長於譬喻東坡和子由詩云人
生到處知何似應似飛鴻踏雪泥泥上偶然留指爪

鴻飛那復計東西
潛之句用此意也

詩林廣記後集卷七

欽定四庫全書

詩林廣記後集卷八

宋 蔡正孫 編

秦少游

少游名觀蘇子瞻以賢良薦於哲宗除博士遷正字紹聖坐黨編置郴州長於議論文麗而思深當世重之

東坡嘗有書薦少游於荊公云向屢言高郵進士秦觀太虛公亦粗知其人今得其詩文數十首拜呈詞格高下固已無逃於左右外此博綜史傳通曉佛言

若此類未易一一數也

黃山谷詩云東南淮海維揚州國士元雙秦少游欲
攀天關守九虎但有筆力回萬牛

荆公荅東坡書云示及秦君詩適葉致遠一見亦以
謂清新婉麗鮑謝似之公奇秦君口之而不置我得
其詩手之而不釋

呂氏云少游過嶺後詩嚴重高古自成一家與舊作
不同

朱文公云山谷詩云對客揮毫秦少游蓋少游只一
筆寫去重意重字皆不問然好處亦自是絕好
隴翁詩評云秦少游詩如時女步春終傷婉弱

秋意題邢敦夫扇

月團新碾瀾花甌飲罷呼兒課楚詞風定小軒無落葉
青蟲相對吐秋絲

雪浪齋日記云少游詩甚麗如青蟲相對吐秋絲之
句是也

王直方詩話云少游嘗以真字題此絕於邢敦夫扇
上黃山谷見之乃於扇背復作小草題一絕皆自所
作也

附山谷題邢敦夫扇

黃葉委庭觀九州小蟲催女獻功裘金錢滿地無人費
百斛明珠惹秋

少游後見此詩云逼我太甚

牽牛花

銀漢初移漏欲殘
步虛人倚玉欄干
仙衣染得天邊碧
乞與人間向曉看

桐江詩話云此少游汝南作教官時於程文通會間
席上賦此真佳作也

晚出右掖門

金爵觚稜轉夕暉
飄飄宮葉墮秋衣
出門塵漲如黃霧
始覺身從天上歸

王直方詩話云少游嘗因晚出右掖門作此一絕識

者以為少游作一黃本校勘而銜耀如此必不能遠到也

秋日

連卷雌蜺挂西樓
逐雨追晴意未休
安得萬粧相向舞
酒酣聊把作纏頭

藝苑雌黃云吟詩喜作豪句須不畔於理方善如東坡觀崔白冬景圖云扶桑大繭如甕盎天女織綃雲漢上往來不遣鳳銜梭誰能鼓臂投三丈此語豪而

甚工石敏若摘林文中詠雪有燕南雪花大於掌冰
柱懸簷一千丈之語豪則豪矣然安得爾高屋邪余
觀太白北風行云燕山雪花大如席秋浦歌云白髮
三千丈其句可謂豪矣奈無此理何如少游秋日絕
句則可謂語豪而工者也

獻東坡

十里荷花菡萏初我公所至有西湖欲將公事湖中了
見說官閑事亦無

王直方詩話云杭有西湖而潁亦有西湖皆為游宴之勝而東坡連守二州其初得潁也有潁人在坐云內翰但只消遊湖中便可以了郡事蓋言其訟簡也少游因作一絕獻之後東坡到潁有謝執政啟云入叅兩禁每玷北扉之榮出典二邦迭為西湖之長或云秦少章作

睡足軒

長年憂患百端慵開戶僧坊頗有功地徹徹虧僧界靜

人除荒穢玉奩空青天併入揮毫裏白鳥時來隱几中
最是人間佳絕處夢殘風鐵響丁東

冷齋夜話云老杜詩云紅稻啄殘鸚鵡粒碧梧棲老
鳳凰枝荆公云綠成白雪朶重綠割盡黃雲稻正青
鄭谷云林下聽經秋苑鹿江邊掃葉夕陽僧以事不
錯綜則不成文章若直叙之則曰鸚鵡啄殘紅稻粒
鳳凰棲老碧梧枝以紅稻於上以鳳凰於下者錯綜
之也言綠成則知白雪為絲言割盡則知黃雲為麥

也秦少游得其意特發奇語而作此詩中四句皆有錯綜之體

暢道姑

瞳人剪水腰如束一幅烏紗裹寒玉超然自有姑射姿
回看粉黛皆塵俗霧閣雲窻人莫窺門前車馬任東西
禮罷曉壇春日靜落紅滿地乳鴉啼

桐江詩話云暢姓惟汝南有之其族尤奉道男女為黃冠者十之八九時有女冠暢道姑姿色妍麗神仙

中人也少游挑之不得乃作詩云

納涼

攜杖來追柳外涼
小橋南畔倚胡床
月明船笛參差起
風定池蓮自在香

呂氏童訓云少游此詩閑雅嚴重又云雨砌墮危芳
風軒納飛絮李公擇以為謝家兄弟得意不能過也
邗溝

霜落邗溝積水清
寒星無數傍船明
菰蒲深處疑無地

忽有人家笑語聲

按邗溝在淮東路高郵軍少游又有寄東坡詩云鮮
鯽經年漬醢醢團臍紫蟹脂填腹後春蓴茁滑於酥
先社薑芽肥勝肉亦形容高郵風物也

庚溪詩話云帛道猷有詩曰連峯數千里修林帶平
津茅茨隱不見雞鳴知有人後秦少游云菰蒲深處
疑无地忽有人家笑語聲僧道潜云隔林彷彿聞機
杼知有人家住翠微其源乃出於道猷而更加鍛鍊

亦可謂善奪胎者也

和黃法曹憶建溪梅花

海陵參軍不枯槁
醉憶梅花愁絕倒
為憐一樹傍寒溪
花水多情自相惱
清淚斑斑知有恨
恨春相逢苦不早
甘心結子待君來
洗雨梳風為誰好
誰云廣平心似鐵
不惜珠璣與揮掃
月落參橫畫角哀
暗香銷盡令人老
天分四時不相貸
孤芳轉盼同衰草
要須健步遠移歸
亂插繁華向晴昊

詩話云少游此詩東坡謂其壓倒林逋觀其稱許之辭則愛重之意可見矣

胡荅溪云秦太虛和黃法曹憶梅花詩但只平穩亦無驚人語子瞻繼之以唱首第二韻是倒字故有西湖處士骨應槁只有此詩君壓倒之句亦是趣韻而已非謂太虛此詩真能壓倒林逋也林逋暗香疎影之句古今詩人尚不曾道得到第恐未易壓倒耳人不細味太虛詩遂謂誠然過矣

附東坡和秦太虛梅花

西湖處士骨應槁，只有此詩君壓倒。
東坡先生心已灰，為愛君詩被花惱。
多情立馬待黃昏，殘雪消遲月出早。
江頭千樹春欲暗，竹外一枝斜更好。
孤山山下醉眠處，點綴裙腰紛不掃。
萬里春隨逐客來，十年花送佳人老。
去年花開我已病，今年對花還草草。
不知風雨捲春歸，收拾餘香還畀昊。

前輩謂東坡梅花詩有押曠字韻三首皆絕妙擺落

陳言古今人未嘗經道者愚謂此篇語意亦高妙如
竹外一枝斜更好之句寫出梅花幽獨閑靜之趣真
不在暗香疎影之下也

和參寥

樓闕過朝雨參差動霽光衣冠分禁路雲氣繞宮牆亂
絮迷春閣
鵲花困日長
平康在何處
十里帶垂楊

王直方詩話云參寥舊有一詩寄少游少游和之後
孫莘老嘗讀此詩至末句云這小子又賤發也少游

後編淮海集遂改云經旬牽酒伴猶未獻長楊

郭功甫

功甫名祥正母夢李太白而生少有詩名梅聖俞曰
天才如此真太白後身也王荊公亦嘆美其詩

潘子真云袁世弼宦遊當塗時功父未冠世弼愛其
才薦於梅聖俞自是有聲既壯頗恃其才下筆曾不
經意論者或惜其造語无刻厲之功

郭清逸云如功甫豈易得但真之作者中便覺有優

劣耳如晉楚之輕剝不當威文之節制也

遜齋閑覽云功甫曾題人山居一聯云謝家莊上无
多景只有黃鸝三兩聲荆公命工繪為圖自題其上
云此是功甫題山居詩處即遣人以金酒鍾並圖遺
之

東坡守錢塘功甫過之出詩一軸示東坡先自吟誦
聲振左右既罷謂坡曰祥正此詩幾分東坡曰十分
來也祥正驚喜問之坡曰七分來是讀三分來是詩

豈不十分也

詩話云郭功甫詩如大排筵席終日揖遜而適口者
少

金山行

金山杳在滄溟中雪崖冰柱浮仙宮乾坤扶持自今古
日月彷彿懸西東我泛靈槎出塵世搜索異境窺神功
一朝登臨望歎息四時想像何其雄捲簾夜閣挂北斗
大鯨駕浪吹長空舟摧岸斷豈足數往往霹靂撻蛟龍

寒蟾八月蕩瑤海秋光上下磨青銅鳥飛不盡暮天碧
漁歌忽斷蘆花風蓬萊久聞未成往壯觀絕致遙應同
潮生潮落夜還曉物與數會誰能窮百年形影浪自苦
便欲此地安微躬白雲南來入長望又起歸興隨征鴻
王直方詩話云郭功甫自梅聖俞贈詩有采石月下
訪謫仙之語以為李白後身緣此有名功甫金山行
鳥飛不盡暮天碧漁歌忽斷蘆花風之句大為荆公
稱賞

胡荅溪云功甫金山行造語豪壯全篇世多未之見也

附梅聖俞采石月贈郭功甫

采石月下訪謫仙夜披錦袍坐釣船醉中愛月江底懸
以手弄月身翻然不應暴落飢蛟涎便當騎鯨上青天
青山有冢人謾傳却來人間知幾年在昔孰識汾陽王
納官貰死義難忘今觀郭裔奇俊郎眉目真似攻文章
死生往復猶康莊樹穴探環知姓羊

詩話云梅聖俞作采石月益信捉月之說按李陽冰
太白集序謂白疾亟枕上授簡俾為集序初无捉月
之說豈古不弔溺故史氏為白諱邪抑小說多妄而
詩老好奇姑以發新意耶

胡荅溪云李白從永王璘之辟璘敗當誅郭子儀請
解官以贖其罪有詔長流夜郎聖俞用事尤為親切
若非姓郭亦難用矣羊祜年五歲令乳母取所弄金
環乳母曰汝先无此物祜即詣鄰人李氏東垣桑木

穴中探得之主人驚曰此吾亡兒所失物也云何持去乳母具言之知李氏子則祜前身也

鳳凰臺次太白韻

高臺不見鳳凰遊浩浩長江入海流舞罷青娥同去國
戰殘白骨尚盈丘風搖落日吹行棹潮擁新沙換故洲
結綺臨春無處覓年年荒草向人愁

餘話云郭功甫嘗與王荊公登金陵鳳凰臺追次李
太白韻援筆立成一座盡傾白句人能誦之郭詩罕

有記者今紀于右

附李太白鳳凰臺

詩見前集太白詩類

寄東坡

平生才力信瑰奇
今在窮荒豈易歸
正似雪林枝上畫
羽翰雖好不能飛

功甫觀東坡畫雪雀有感作詩寄惠州後東坡北歸
又用前韻寄之

用前韻寄東坡

秋霜春雨不同時
萬里今從海外歸
已出網羅毛羽在
却尋雲迹帖天飛

按此詩東坡北歸後次其韻荅之今附於左

附東坡次韻郭功甫二首

蚤知臭腐即神奇
海北天南總是歸
九萬里風安稅駕
雲鵬今悔不卑飛

可憐倦馬不知時
空羨騎鯨得所歸
玉局西南天一角
萬人沙苑看孤飛

按年譜云元符三年庚辰自儋移廉又移舒永提舉
成都玉局觀

訪隱者

一徑沿厓踏蒼壁半塢寒雲抱泉石
山翁酒熟不出門
殘花滿地無行迹

山寺老僧

逢人寂無語結草日棲禪
但見蟲花笑龐眉不記年

西村

遠近皆僧刹西村八九家得魚無賣處沽酒入蘆花
黃玉林云功甫詩如此數絕真得太白體宜為諸老
之所稱賞也

陳簡齋

簡齋名與義字去非少學詩於崔鷗德符嘗問作詩
之要崔曰凡作詩工拙所未論大要忌俗而已後以
墨梅詩見知于徽廟高宗朝參大政有簡齋集行於世
葛勝仲序簡齋詩集云世言詩能窮人予謂詩不惟

不能窮人且能達人孰謂詩人倒窮哉故參知政事
西洛陳公某少踔厲不羣篇籍之在世无不讀既讀
輒記不忘政和三年以上舍解褐分教輔郡益沉酣
書傳大肆於詩文天分既高用心亦苦務一洗舊常
畦徑意不拔俗語不驚人不輕出也宣和中徽宗皇
帝見其所賦墨梅詩善之亟命召對有見晚之嗟遂
登冊府擢掌符璽而進用矣會兵興搶攘避地湖廣
泛洞庭上九疑羅浮雖流離困厄而能以山川秀傑

之氣益昌其詩故晚年賦詠尤工搢紳士庶爭傳誦而旗亭傳舍摘句題寫殆徧號稱新體今天子夢想名士以臺郎召還益以詩文被簡注徧掌內外翰年幾何遂以器業預政所謂詩能達人公殆其一也

朱文公云古人詩中有句今人詩只一直說如簡齋詩云亂雲交翠壁細雨濕青林之類他是什麼句法胡荅溪云陳去非詩如踈踈一簾雨淡淡滿枝花官裏簿書何日了樓頭風雨見秋來客子光陰詩卷裏

杏花消息雨聲中皆平淡而有工

劉後村云元祐後詩人迭起一種則波瀾富而句律疎一種則鍛鍊精而情性遠要之不出蘇黃二體而已及簡齋出始以老杜為師第其品格當在諸家之上

滄浪詩體云簡齋自是一體亦本江西之派而小異耳

和張規臣水墨梅五絕

刻畫無鹽醜不除此花風韻更清姝從教變白能為黑
桃李依然是僕奴

病眼昏花已數年只應梅蕊故依然誰教也作陳玄面
眼亂初逢未敢憐

粲粲江南萬玉妃別來幾度見春歸相逢京洛渾依舊
惟恨緇塵染素衣

含章簷下春風面造化功成秋兔毫意足不求顏色似
前身相馬九方臯

自讀西湖處士詞年年臨水看幽姿晴窗畫出橫斜影
絕勝前村夜雪時

文公語錄云高宗最愛簡齋客子光陰詩卷裏杏花
消息雨聲中又曰座間且說簡齋墨梅詩何者最勝
或以臯字韻一首為對先生曰不如相逢京洛渾依
舊惟恨緇塵染素衣

後村詩話云簡齋墨梅之類尚是少作建炎以後避
地湖嶠行路萬里詩益奇壯

胡荅溪云簡齋墨梅臯字韻一絕徽廟召對稱賞自此知名仕宦亦浸顯陳无己所以謂之詩能達人矣未見其窮也葛魯卿序簡齋集亦用此語蓋為是也

五言

泊舟華容縣湖水終夜明淒然不能寐左右菰蒲聲窮途事多違勝處心亦驚三更螢火開萬里天河橫腐儒憂平世况復值甲兵終然無寸策白髮滿頭生

後村詩話云簡齋此詩造次不忘憂愛以簡嚴掃繁

縵以雄渾代尖巧第其品格故當在諸家之上也

胡荅溪云去非舊有詩云風流丘壑真吾事籌策廟堂非所知其後登政府无所建明卒如其言愚謂此詩末句云終然无寸策白髮滿頭生其意亦頗類此

海棠

海棠默默要詩催日暮紫綿無數開欲識此花奇絕處
明朝有雨試重來

復齋謾錄云鄭谷曾有海棠詩云穠豔最宜新着雨

妖嬈全在欲開時
歐公以鄭詩為格卑去非之詩用
此意也然陳雖本鄭意便覺才力相去不侔矣山谷
亦有紫綿揉色海棠開之句

感事

風斷黃龍府雲移白鷺洲
菊花紛四野作意為誰秋
劉後村云簡齋此詩頗逼老杜

題池亭

聊將兩蓬鬢起照千丈鏡
微波喜搖人小立待其定

詩說雋永云京師葆真宮垂楊映照有山林之趣去
非將罷尚符璽日題其池亭云盖有深意寓也

劉大資挽詩

天柱欹傾日堂堂墮敵圍遂聞王燭死不見華元歸一
代名超古千年淚染衣當時如有繼猶足變危機

又

一死公餘事由來彼亦人使知臨難日猶有不欺臣河
洛傾遺憤英雄嘆後塵煌煌中興業公合冠麒麟

按靖康三年北壁守禦官劉大資給金人欲用為樞
密不肯受是夕自書片紙寄家曰正女不事二夫忠
臣不事兩君况主憂臣辱主辱臣死此予所以死也
付指揮使陳瓘劉玠乘間入城歸報諸子闔戶以衣
條自縊而死

重陽

憶得甲辰重九日天恩曾預宴城東龍沙北望西風冷
誰折黃花壽兩宮

愚謂簡齋此詩悲慨之情溢於言外有老杜風此後村所以謂其造次不忘憂愛也

次韻周教授秋懷

一官不辨作生涯幾見秋風卷岸沙
宋玉有文悲落木陶潛無酒對黃花
天機袞袞山新瘦世事悠悠日自斜
誤矣載書三十乘東門何地不宜瓜

黃玉林云天機袞袞山新瘦世事悠悠日自斜之句
真合在蘇黃之右晉張華嘗載書三十乘

春曉

朝來庭樹有鳴禽紅綠扶春上遠林忽有好詩生眼底
安排句法已難尋

小園解后錄云簡齋此詩觀其末後兩句則詩之為
詩豈可以作意為之邪

韓子蒼

子蒼名駒呂居仁作江西宗派圖置子蒼於其間而
子蒼不悅子蒼嘗云作詩文當得文人印可乃自不

疑所以前輩汲汲於求知也

蘇黃門初見韓詩自云恍然再見儲光義也樂城集
中有題韓駒秀才詩卷一絕云唐朝文士例能詩李
杜高深到者稀我讀君詩笑無語恍然再見儲光義
臞翁詩評云韓子蒼詩如梨園按樂排比得倫

題畫太一真人

太一真人蓮葉舟脫巾露髮寒飈輕風為帆浪為楫
卧看玉宇浮中流中流蕩漾翠綃舞穩如龍驤萬斛舉

不是峯頭十丈花
世間那有葉如許
龍眠畫手老入神
尺素幻出真天人
恍然坐我水仙府
蒼烟萬頃波潏潏
玉堂學士今劉向
禁直峇堯九天上
不須對此融心神
會植青藜夜相訪

胡荅溪云李伯時畫太一真人卧一大蓮葉中手執
書一卷仰讀蕭然有物外之思子蒼題詩其上語意
絕妙真能詠盡此畫也

題畫宮女

睡起昭陽暗淡粧不知緣底背斜陽若教轉盼一回首
三十六宮無粉光

胡荅溪云李伯時畫背面宮女子蒼題此詩其上乃
用東坡續麗人行中語意然不及坡之偉麗也

附東坡續麗人行

深宮無人春晝長沉香亭北百花香美人睡起薄梳洗
燕舞鶯啼空斷腸畫工欲畫無窮意背立春風初破睡
若教回首更嫣然陽城下蔡俱風靡杜陵飢客眼長寒

蹇驢破帽隨金鞍
隔花臨水時一見
只許腰肢背後看
心醉歸來茅屋底
方信人間有西子
君不見孟光舉案
與齊眉何曾背面
傷春啼

詩注云李仲謀家有周昉畫背面欠伸內人極精戲
作此詩

真妃上馬圖

翠華欲幸長生殿
立馬樓前待貴妃
尚覓君王一回顧
金鞍欲上故遲遲

胡荅溪云子蒼題明皇真妃上馬圖詩意極佳余舊
觀蔡天啟集其集中亦有此詩然不知竟是誰作也

和李上舍冬日

北風吹日晝多陰日暮擁堦黃葉深倦鵲遶枝翻凍影
飛鴻摩月墮孤音推愁不去如相覓與老無期稍見侵
顧藉微官少年事病來那復一分心

復齋謾錄云子蒼和李上舍冬日詩日暮擁堦黃葉
深之句最為世所推賞故李彭商老有建除體贈子

蒼云滿朝以詩名何獨遺大雅平生黃葉句摸索便
知價蓋是時子蒼自館職斥宰分寧時也

和館中上元遊葆真宮觀燈

開卷愛公如李益解言明月逐人來多情好共春流轉
刻燭題詩又一回

復齋謾錄云火樹銀花合星橋鐵鎖開暗塵隨馬去
明月逐人來此唐蘇味道上元夜詩也子蒼以為李
益何邪然蘇味道之意乃取梁朱超望月詩耳朱云

惟餘故樓月遠近必隨人

謝信守連鵬舉送酒

上饒藉甚文章守曾共紫薇花下杯
鈴閣晝閑思老病故教從事送春來

復齋謾錄云唐皮日休謝人送酒詩亦有青州從事之語子蒼此詩意思頗同當有辨其優劣者

附皮日休謝人送酒

門巷寂寥空紫苔先生應渴解醒杯
醉中不得相親問

故遣青州從事來

晉桓溫有主簿善別酒味以好者為青州從事謂青州有齊郡言到臍也

代葛亞卿作

君住江濱起畫樓
妾居海角送潮頭
潮中有妾相思淚
流到樓前更不流

復齋謾錄云晁元忠西歸詩云安得龍山潮駕回安河水水從樓前來中有美人淚子蒼之詩取此意也

唐孫叔向有經昭應溫泉詩云一道泉回遶御溝先
皇曾向此中遊雖然水是無情物也到宮前咽不流
子蒼末句又用孫語也

胡荅溪云余以陵陽集閱之子蒼十絕為葛亞卿作
皆別離之詞必亞卿與一娼別子蒼代賦此詩其詩
有云妾願為雲逐畫橋君言十日看歸航以此可知
也又有云初合雙鬟觸事羞離筵酌酒強回頭縱言
眼軟偏饒淚莫道心癡不解愁亦佳句也徐師川曾

跋此詩云

附徐師川跋子蒼代葛亞卿詩

夏木陰陰欲放船
黃鸝啼了落花天
十詩盡說人間事
付與風流葛稚川

送宜黃丞周表卿

昔年束帶侍明光
曾見揮豪

照對

御床將為驛驕
已騰踏

不知鷓鴣尚摧藏
官居四合峯巒

雨綠

驛路千林橘柚

霜黃

莫

為艱難歸故里
戀鄉闕留不去

漢廷今重甲科郎

室中語云公賦此詩送表卿及表卿既行久之乃改對字作照字蓋子瞻送孫勉詩有云君為淮南秀文彩照金殿注云君嘗攷中進士第一人也改綠為雨黃為霜又改莫戀鄉關留不去莫為艱難歸故里益見其工此詩之所以不厭改也公又題辛仲及鬪牛圖詩云好事誰如公子賢斷縑求買不論錢後改云千金買盡亦欣然亦於卷中斷取舊詩別題之

進退韻近體

盜賊猶如此蒼生困未蘇今年起安石不用哭包胥子
去朝行在人應問老夫髭鬚衰白盡瘦地日攜鉏

胡荅溪云鄭谷等共定今體詩格一進一退韻如李
師中送唐介七言八句詩是也子蒼於五言八句近
體詩亦用此格蓋蘇夫字在十虞韻胥鉏字在九魚
韻

附李師中送唐介

孤忠自許衆不與獨立敢言人所難去國一身輕似葉

高名千古重於山並游英俊後顏何厚未死奸諛骨已寒
天為吾君扶社稷肯教夫子不生還

紺素雜記云鄭谷與僧齊己皎然共定今體詩格云
凡詩用韻有數格一曰葫蘆一曰轆轤一曰進退葫
蘆韻者先二後四轆轤韻者雙出雙入進退韻者一
進一退失此則繆矣李師中此詩正所謂進退韻格
也難寒二字在二十五寒韻山還二字在二十八山
韻誠合體格豈率爾而為之哉近閱冷齋夜話載當

時唐李對荅語言乃以此詩為落韻詩蓋渠不知鄭谷所定詩格有進退之說而妄為云云也

倦游雜錄云唐介為臺官廷疏宰相文彥博以燈籠錦媚貴妃致位宰相仁宗怒謫介英州別駕朝中士大夫以詩送行者頗衆獨待制李師中一篇為人傳誦

過汴河

汴水日馳三百里扁舟東下更開帆旦辭杞國風微北

夜泊寧陵月正南老樹挾霜鳴窸窣寒花承露落氈氈
茫然不悟身何處水色天光共蔚藍

小園解后錄云唐人詩云打起黃鶯兒莫教枝上啼
幾回驚妾夢不得過遼西人有問詩法於韓子蒼子
蒼令讀此詩以為法子蒼有過汴河詩云汴水日馳
三百里云云人有問詩法於呂居仁居仁令鑒子蒼
此詩以為法後之學者熟讀此二篇思過半矣

詩林廣記後集卷八